

րին ընծաներով: Վերոյիշեալ դէպքի և խանի զայրոյթի առի-
թը լինում է մի հայ քահանայ Գիրք զիւղացի, որին խանը շատ
սիրելիս է եղել: Քահանան այրիանալով՝ խնդրում է խանին միջ-
նորդել վիճակի առաջնորդ Յովհան եպիսկոպոսին, որ թոյլ տայ
իրան երկրորդ անգամ ամուսնանալ և քահանայական պաշտօն
կատարել. խանը պատգամաւոր ուղարկելով՝ միջնորդում է Յով-
հան եպիսկոպոսին. բայց նա պատասխանում է. «եթէ քահա-
նան կամենում է կրկին ամուսնանալ՝ կարող է, միայն քահա-
նայութիւն անել չի կարող մեր եկեղեցական կանոնաց համա-
ձայն»: Խանը կրկին պատգամաւորի միջոցաւ պահանջում է թոյլ-
տուութիւն քահանային, որ կրկին ամուսնանայ և մի և նոյն
ժամանակ քահանայութիւն անէ: Յովհան եպիսկոպոսը մերժում
է խանի խնդիրը բացարձակապէս: Խանը զայրանալով՝ հրամա-
յում է եպիսկոպոսին տանել Աղսու քաղաքը և այն տեղ կա-
պելով նորա ոտերը՝ դանակոծ անել¹⁾:

Խան Պօղոս բէգը առանձին յարգանք է վայելել խանի
մօտ, յարգելի է եղել նոյնպէս բէգերի, գաւառական թուրքերի
և հայերի մէջ. նոցա՝ որոնք կարիք են ունեցել, ձեռնտու է ե-
ղել: Հանգամանքները փոխվում են. 1818 թ. Մուստաֆա խա-
նը Ֆիթղաղից փախչում գնում է պարսից երկիրը. այդ ժա-
մանակ ռուսաց տէրութեան կարգադրութեամբ Ֆիթղաղից
քաղաքը տեղափոխում են Հին Համախի, ուր հին քաղաք է ե-
ղել, որ է այժմեան Համախին: Տեղափոխվում է բնակիչների
հետ միասին և յիշեալ խան—Պօղոս աղան, որ նոյնպէս սիրե-
լի և յարգելի է լինում ռուսաց զլխաւոր պաշտօնատար աստի-
ճանաւորներին՝ այն է զօրապետ (генералъ) Երմալովին, բարօն
Րօզինին, զօրապետ Ղօլովին, որին մեծ յարգանքով հիւրասի-
րել է իւր տանը հանդերձ նորա հետ եղած աստիճանաւորնե-
րով այն ժամանակ, երբ պատերազմ էր գնում ընդդէմ թշնա-
մեաց՝ լէզզինների: Իշխան (կնեազ) Վարանցովը առանձնապէս
սէր և յարգանք է ունեցել Պօղոս աղայի հետ:

¹⁾ Եւր երջանիկ խեղճ նախնիքը այսպէս դժուարութեամբ են պահա-
նել եկեղեցւոյ կարգ ու կանոնը. բայց մենք՝ նոցա յաջորդներս և ժառանգ-
երբս . . . Աստուած չնորհք տայ ամենիս: Մ. Ե Ս: